

吳興叢書

七國考

二



七國攷卷三

明烏程董說

秦都邑

附關塞

犬邱

秦紀非子居犬邱周孝王分土爲附庸邑之秦注今天水隴邱縣秦亭也地理志今隴西秦亭秦谷是也括地志秦州清水縣本名秦嬴姓邑漢屬天水郡水經注清水逕清水城南又西與秦水合水出東北大隴山秦谷歷三泉合成一水而歷秦川川有故亭秦仲所封也秦之爲號始是秦水又西南歷隴川逕六槃口過清水城西南注清水輿地廣記秦州隴城縣有秦谷郡縣志秦

城在隴州東南二十五里世本云秦非子始封於秦故秦本紀稱周孝王曰朕分之土邑秦隴西秦谷亭是也

廢邱

秦紀莊公居其故西犬邱世紀周懿王所都今槐里是也世本云秦非子元孫莊公徙廢邱

汧渭之會

秦紀平王封襄公爲諸侯賜之岐以西之地于是始國文公居西垂宮東獵至汧渭之會乃卜居之占曰吉卽營邑之括地志故汧城在隴州汧源縣南三里世紀云襄公二年徙居汧卽此城郿縣故城在岐州鳳翔府郿縣東北十五里文公東獵汧渭之會卜居之乃營邑焉

卽此城也世紀文公徙汧今扶風郿縣是也

平陽

世紀云出公徙平陽郿之平陽亭是也秦紀云寧公徙平陽括地志平陽故城在岐州岐山縣西四十六里秦寧公徙都之處岐山縣有平陽鄉鄉內有平陽聚武公居平陽封宮正義云在平陽城內水經注汧水逕郁夷縣逕平陽故城南

雍城

秦紀德公初居雍城大鄭宮卜居雍子孫飲馬于河世紀云今扶風雍是也括地志岐州雍縣南七里故雍城秦德公大鄭城也秦紀康公居雍高寢桓公居雍太寢

今鳳翔府天興縣

櫟陽

秦紀獻公城櫟陽徙都之世紀今馮翊萬年是也括地志櫟陽故城一名萬年城在雍州東北百二十里漢七年分櫟陽城內爲萬年縣通典漢萬年縣在京兆府櫟陽縣東北二十五里櫟陽故城是周明帝省萬年入廣陽更于長安城中置萬年縣仍移廣陽縣入舊萬年縣城卽今櫟陽縣是也

咸陽

秦紀孝公十二年作爲咸陽築冀闕徙都之按別紀云孝公十三年始都咸陽蓋十二年築闕而十三年都之

也世紀漢元年更名新城屬扶風後并于長安故太史公曰長安故咸陽也元鼎三年復別爲渭城今長安西北渭水陽有故城西京賦秦里其朔實爲咸陽括地志咸陽故城一名渭城在雍州咸陽縣東十五里京城北四十五里卽秦徙都者今咸陽縣古之杜郵劉伯莊云冀猶記事闕猶象魏也始皇置酒咸陽宮營作朝宮渭南上林苑中先作前殿阿房爲閣道自殿下直抵南山爲複道自阿房渡渭屬之咸陽自孝公至子嬰十世居咸陽元和郡縣圖志山南曰陽水北曰陽在北山之南渭水之北故曰咸陽西都賦云左據函谷二嶠之阻表以太華終南之山右界褒斜隴首之險帶以洪河涇渭

之川眾流之隈汧湧其西華實之毛則九州之上腴焉
防禦之阻則天地之奧區焉是故橫被六合三成帝畿
周以龍興秦以虎視蘇秦說秦惠王曰大王之國西有
巴蜀漢中之利北有胡貉代馬之用南有巫山黔中之
限東有殽函之固田肥美民殷富戰車萬乘奮擊百萬
沃野千里蓄積饒多地勢形便此所謂天府天下之雄
國也

淮南注云神農明堂曰天府蘇秦天
府二字本此謂可以建都之地也

胡三省通鑑

注云河自龍門上口南抵華陰而東流秦國在河之西
山自烏鼠同穴連延爲長安南山至于太華秦國在山
之西韓魏趙齊楚燕六國皆在河山以東荀子應侯問
孫卿曰入秦何見孫卿曰其國塞險形勢便山林川澤

美天材之利多，是形勝也。入境觀其風俗，其百姓樸其聲樂，不流汙其服，不挑甚，畏有司而順古之民也。及都邑官府，其百吏肅然，莫不恭儉敦敬，忠信而不樸。古之吏也，入其國，觀其士大夫，出于其門，入于公門，出于公門，歸于其家，無有私事也。不比周，不朋黨，倜然莫不明通而公也。古之士大夫也，觀其朝廷，其間聽決百事，不留恬然如無治者。古之朝也，故四世有勝，非幸也。數也是所見也。故曰佚而治，約而詳，不煩而功，治之至也。秦類之矣。雖然，則甚有其謬也。兼數具者而盡有之，然而縣之以王者之功名，則倜倜然其不及遠矣。是何也？則殆其無儒耶？漢書志云：秦地于天官東井輿鬼之分野。

也其界自宏農故關以西京兆扶風馮翊北地上郡西
河安定天水隴西南有巴蜀廣漢犍爲武都西有金城
武威張掖酒泉敦煌又西南有牂牁越雋益州皆宜屬
焉秦地于禹貢時跨雍梁二州詩風兼秦幽兩國昔后
稷封棗公劉處豳太王徙岐文王作鄴武王治鎬其民
有先王遺風好稼穡務本業故豳詩言農桑衣食之本
甚備有鄠杜竹林南山檀栢號稱陸海爲九州膏腴始
皇之初鄭國穿渠引涇水溉田沃野千里民以富饒漢
興立都長安徙齊諸田楚昭屈景及諸功臣家于長陵
後世世徙吏二千石高訾富人及豪傑并兼之家于諸
陵蓋亦以強幹弱支非獨爲奉山園也是故五方雜厝

風俗不純其世家則好禮文富人則商賈爲利豪傑則遊俠通姦潁南山近夏陽多阻險輕薄易爲盜賊常爲天下劇又郡國輻湊浮食者多民去本就末王侯貴人車服僭上眾庶放效羞不相及嫁娶尤崇侈靡送死過度天水隴西山多林木民以板爲室屋及安定北地上郡西河皆迫近戎狄修習戰備高上氣力以射獵爲先故秦詩曰在其板屋又曰玉于興師修我甲兵與子偕行及車鄰駟驥小戎之篇皆言車馬田狩之事漢興六郡良家子選給羽林期門以材力爲官名將多出焉孔子曰君子有勇而亡義則爲亂小人有勇而亡義則爲盜故此數郡民俗質木不恥寇盜自武威以西本匈奴

昆邪王休屠王地武帝時攘之初置四郡以通西域隔絕南羌匈奴其民或以關東下貧或以報怨過當或以諄逆亡道家屬徒焉習俗頗殊地廣民稀水草宜畜牧故涼州之蓄爲天下饒保邊塞二千石治之咸以兵馬爲務酒禮之會上下通焉吏民相親是以其俗風雨時節穀糴常賤少盜賊有和氣之應賢于內郡此政寬厚吏不苛刻之所致也巴蜀廣漢本南夷秦并以爲郡土地肥美有江水沃野山林竹木疏食果實之饒南賈滇夔僮西近邛笮馬旄牛民食稻魚亡凶年憂俗不愁苦而輕易淫佚柔弱褊阨景武間文翁爲蜀守教民讀書法令未能篤信道德反以好文刺譏貴慕權勢及司馬

相如游宦京師諸侯以文辭顯於世鄉黨慕循其迹後
有王褒嚴遵揚雄之徒文章冠天下繇文翁倡其教相
如爲之師故孔子曰有教無類武都地雜氐羌及犍爲
牂牁越嶲皆西南外夷武帝初開置民俗略與巴蜀同
而武都近天水俗頗似焉故秦地天下三分之一而人
眾不過什三然量其富居什六秦幽吳札觀樂爲之歌
秦曰此之謂夏聲自井十度至柳三度謂之鶉首之次
秦之分也又漢志云雍州其山鎮曰吳嶽國語謂之西
吳古文以爲沂山秦都咸陽以爲西嶽

函谷關

以下附東

賈子過秦論曰秦孝公據殽函之固范雎謂左關阪卽

殺函也鹽鐵論曰秦邑商洛殺函以禦諸侯淮南墜形
訓九塞曰殺阪按函谷關在陝州靈寶縣西南十二里
西征記曰關城路在函中深險如函故以爲名其中劣
通東西十五里絕岸壁立崖上柏林蔭谷中殆不見日
關去長安四百里日入則閉雞鳴則開秦法也東自崤
山西至潼津通名函谷號曰天險所謂秦得百二也孟
嘗君客雞鳴出函谷燕太子丹亦雞鳴出函谷博物志
云秦前有藍田之鎮後有胡苑之塞左殺函右隴蜀西
通流沙險阻之國也西征賦云躡函谷之重阻看天險
之襟帶跡諸侯之勇怯莫算嬴氏之利害或開關以延
敵競遁逃以奔竄有噤門而莫啟不窺兵于山外班固

西都賦注云函谷者其谷似函故曰函谷江統函谷關賦云唯七國之西征仰斯阻而震恐豈隘險之難犯將羣帥之無勇鹽鐵論云諸侯之有關梁庶人之有爵祿非升平之興蓋自戰國始也

武關

南

散關

西

蕭關

北

臨晉關

張儀曰秦地被山帶河四塞以爲固徐廣曰東函谷南武關西散關北蕭關武關卽建武關也張衡東京賦秦負阻於二關注云二關武關函谷關也通鑑卽墨大夫見齊王曰齊地方數千里帶甲數百萬王收而與之百萬人之眾使收三晉之故地卽臨晉之關可以入矣鄢郢大夫不欲爲秦而在城南下者百數王收而與之百

萬之師使收楚故地卽武關可以入矣胡三省云收三
晉兵自河東攻秦則入臨晉關楚攻秦自南陽入武關
七國形勢攷云秦地西有隴關東有函谷臨晉南有嶢
武關北有蕭居庸天井關以臨胡庭故曰關中賈誼新
書云所謂建武臨晉函谷關者大抵備山東諸侯也武
關在商州商洛以限南諸侯函谷在陝州靈寶以限北
諸侯臨晉在同州朝邑以限東諸侯隴關卽隴山關也
七國形勢攷引正義云秦東有函谷蒲津龍門合河等
關南山及武關嶢關西有大隴山及隴山關大震烏蘭
等關北有黃河南塞故曰被山帶河四塞以爲固臣瓚
曰臨晉者秦築高壘以臨晉國故曰臨晉

湖關

史記秦昭王使謁者王稽於魏載范雎入秦至湖關望見穰侯車騎東行縣邑

松柏塞

荀子曰秦有松柏之塞

焉氏塞 鄭所塞

呂覽曰公子連亡在魏欲入從鄭所之塞右主然守塞弗入公子連去入翟從焉氏塞菌改入之

長城

王應麟曰秦昭王滅義渠於是秦有隴西北地上郡築長城以距胡非自始皇始也古今注云秦築長城土色

皆紫故稱紫塞楊泉物理論云始皇使蒙恬築長城死者相屬民歌曰生男慎勿舉生女哺用脯不見長城下尸骸相撐拄北邊備對云秦城多承燕趙燕城起於造陽而至襄平遼陽造陽者上谷地也襄平者遼東縣也遼陽者遼水之北也皆燕國邊胡之地故其建築亦在此地也趙之城則自代地而西屬於高闕代者鴈門都也高闕者靈州北流河之西陰山之上游也趙武靈王國於雲代故其備胡之城但能並河而西以極乎趙境耳至秦已并六國天下爲一西自上郡北地而東至遼東西悉爲秦有故蒙恬之致役也西起臨洮則中國極西之地也北屬遼東則中國極東之地也自東迄西殆

萬餘里無論燕趙之與岷蘭其在當時蓋無一地而無長城也於是會合三制而要其所宿則秦城之長固周乎中國之北矣然審而求之則其城不皆秦築也秦但補築使足耳元和志云開皇城自代之繁峙縣北經蔚州北十里入飛狐縣夫其自代而蔚則極北而與虜邊中國之地不出此外秦人爲城以城中夏勝地固當在此矣志又曰開皇城起嵐州合河縣經幽州皆因古迹修築夫嵐州者樓煩郡也初爲胡地後爲趙惠文所取則合河縣固可立城矣幽州者戰國時屬燕地則非趙人所有何由可施版築也是前乎燕趙別有築之者史所不傳故概言因古跡修築也

田齊都邑

臨淄

通釋齊田和立爲齊侯都臨淄國策蘇秦說齊宣王曰齊南有泰山東有琅琊西有清河北有渤海此所謂四塞之國也臨淄甚富而實其民無不吹竽鼓瑟擊筑彈琴鬪雞走狗六博踏鞠者臨淄之途車轂擊人肩摩連袂成幃舉袂成幕揮汗成雨家敦而富志高而揚田肯曰齊東有琅琊卽墨之饒南有泰山之固西有濁河之限北有渤海之利地方二千里持戟百萬縣隔千里之外齊得十二焉此東秦也荀卿子說齊相曰今巨楚縣吾前大燕鱗吾後勁魏鈞吾右西壤之不絕若繩楚人

則有襄賁開陽以臨吾左是一國作謀則三國必起而乘我如是則齊必斷而爲四三國若假城然耳鹽鐵論曰齊撫阿甄關榮厯倚泰山負海隅漢地理志曰齊地虛危之分野也東有淄川東萊琅琊高密膠東南有泰山城陽北有千乘清河以南渤海之高樂高城重合陽信西有濟南平原皆齊分也少昊之世有爽鳩氏虞夏時有季荊湯時有逢公柏陵殷末有蒲姑氏皆爲諸侯國此地至周成王時蒲姑氏與四國共作亂成王滅之以封師尙父是爲太公詩風齊國是也臨淄名營邱故齊詩曰子之還矣遭我乎穽之間兮又曰俟我於著乎而此亦其舒緩之體也吳札聞齊之歌曰泱泱乎大風

也哉其太公平國未可量也古有分土七分民太公以齊地負海島鹵少五穀而人民寡乃勸以女工之業通魚鹽之利而人物輻湊後十五世桓公用管仲設輕重以富國合諸侯成伯功身在陪臣而取三歸故其俗彌侈織作冰紈繡綺純麗之物號爲冠帶衣履天下初太公治齊修道術尊賢智賞有功故至今其土多好經術矜功名舒緩闊達而足智其失夸奢朋黨言與行繆虛詐不情急之則離散緩之則放縱始桓公兄襄公淫亂姑姊妹不嫁於是令國中民家長女不得嫁名曰巫兒爲家主祠嫁者不利其家民至今以爲俗痛乎道民之道可不慎哉臨淄海岱之間一都會也其中具五民云

陽關 以下附南

博物志云齊南有長城巨防陽關之險北有河濟足以爲固越海而東通於九夷西界岱嶽配林之險坂固之國也史記齊世家魯伐我入陽關徐廣曰在鉅平括地志云兗州博平縣南二十九里西臨汶水

穆陵關

山東志穆陵關在沂水縣北一百二十里古齊關也

博關

張儀說齊曰悉趙兵渡清河指博關臨淄卽墨非王之有也史記齊宣王二年三晉之王皆因田嬰朝齊王于博望關而去輿地廣記博州戰國屬齊趙衛三國之交

徐廣曰齊威王六年晉伐齊至博陵

長城

泰山記云泰山西有長城緣河經泰山千餘里至琅琊臺入海國策蘇秦云長城鉅防以爲塞齊記云齊宣王乘山嶺之上築長城東至海西至濟州千餘里以備楚括地志西北起濟州平陰縣緣河歷泰山城岡上經濟州淄州卽西南兗州傅城縣北東至密州琅琊臺入海正義長城西在濟州平陰縣界竹書紀年梁惠成王二十年齊閔王築防以爲長城郡縣志故長城首起鄆州平陰縣北二十九里齊湣王所築外紀威烈王十六年王命韓趙伐齊入長城田世家趙人歸我長城在齊威

王時山東志齊長城在諸城縣南四十里跨安邱境連
巨蒙泰萊蕪直至平陰乃齊宣所築以禦楚寇者

楚都邑

關塞附

丹陽

通釋楚熊繹當周成王時封於楚蠻居丹陽地輿志秭
歸縣東有丹陽城周迴八里熊繹始封也丹陽凡有數
處楚鬻熊始封丹陽則在今秭歸縣後楚文王徙都江
陵府枝江縣亦曰丹陽漢于宛陵置丹陽郡隋于丹州
置丹陽郡唐于京口置丹陽郡而西漢志乃以曲阿之
丹陽爲楚所封誤矣

郢

楚文王始都郢括地志云平王城郢在江陵縣東北十六里故郢城是也楚始都丹陽在今枝江文王遷郢昭王遷鄢皆在今江陵境中杜預左傳注云楚國今南郡江陵縣北紀南城也謝靈運鄴中集詩云南登宛郢城今江陵北十二里而有紀南城卽古之郢都也又謂之南郢桓譚新論曰楚之郢都車掛轂民摩肩市路相交號爲朝衣新而暮衣敝

郢

楚昭王去郢北徙都郢輿地廣記郢縣故都國春秋時自商密遷此爲楚附庸楚滅之昭王畏吳自郢遷焉後復還郢吳越春秋作昭王徙于蔞若注云蔞若字誤當

作郡蘇秦說楚威王曰楚地西有黔中巫郡東有夏州
海陽南有洞庭蒼梧北有汾涇之塞郇陽

陳城

楚襄王二十三年秦拔郢都北保于陳城

壽春

考烈王二十二年冬徙都壽春命曰郢今安豐軍壽春
縣漢地理志云楚地翼軫之分野也今之南郡江夏零
陵桂陽武陵長沙及漢中汝南郡盡楚分也周成王時
封文武先師鬻熊之曾孫熊繹於荆蠻爲楚子居丹陽
後十餘世至熊達是爲武王寢以強大後五世至莊王
總帥諸侯觀兵周室并吞江漢之間內滅陳蔡之國後

十餘世頃襄王東徙於陳楚有江漢川澤山林之饒江南地廣或火耕水耨民食魚稻以漁獵山伐爲業果蔬羸蛤食物常足故蚘蠃媮生而亡積聚飲食還給不憂凍餓亦亡千金之家信巫鬼重淫祀而漢中淫佚枝柱與巴蜀同俗汝南之別皆急疾有氣勢江陵故郢都西通巫巴東有雲夢之饒亦一都會也

扞關

以下附

七國形勢考云楚肅王四年周安王二十五年蜀伐楚取茲方楚爲扞關以拒之鹽鐵論云楚自巫山起方城屬巫黔中設扞關以拒秦一名扞關括地志今陝州巴山縣界張儀說楚王曰秦西有巴蜀方船積粟起於汶

山浮江以下不至十日而距扞關扞關驚則從竟陵以東盡城守矣黔中巫郡非王之有

江關 陽關

華陽國志巴楚相攻伐故置江關陽關括地志云江關今夔州魚復縣南二十里江南岸白帝城是陽關今涪州永安縣治關城也

弱關

水經注江水自關東逕弱關扞關弱關在建平秭歸界昔巴楚數相攻伐藉險置關以相防捍

昭關

范曄傳子胥橐載而出昭關夜行晝伏

陘塞

國策北有汾陘之塞徐廣曰春秋齊伐楚次於陘楚威王十一年魏敗楚陘山在密縣正義曰陘山在鄭州新鄭縣西南三十里楚世家魏取我陘山在鄭陘塞其說有三山海經有少陘之山太平御覽謂滎陽則正義新鄭近之滎陽春秋爲鄭戰國爲韓蓋南北之隘道楚爲塞以御北方故蘇秦於韓曰南有陘山於楚曰北有陘塞其地一也楚漢亦於此決勝負焉左傳楚子廉治兵於汾注云襄城縣東北有汾邱城今襄城屬汝州汾陘之塞蓋在汝鄭二州

龜阨之塞

史記秦踰黽阨之塞而攻楚不便劉昭曰江夏郡鄖縣古黽阨之塞也

符離之塞

國策楚苞九夷地方千里西有符離之塞北有甘魚之口

方城 萬城

淮南兵略訓曰楚地南卷沅湘北饒潁泗西包巴蜀東裹郟淮潁汝以爲沘江漢以爲池垣之以鄧林縣之以方城山高尋雲谿肆無景荀子議兵曰汝潁以爲險江漢以爲池限之以鄧林緣之以方城左傳云方城以爲城地理志葉縣有長城號曰方城朱子曰荆地勢四平

其守當在外楚人謂方城爲城漢水爲池是也博物志云楚後背方城前及衡嶽左則彭蠡右則九疑有江漢之流實險阻之國也盛宏之荊州記云葉東界有故城始犇縣東至瀨水達泚陽界南北聯亘數百里號爲方城一謂之長城南北雖無基築皆連山相接而漢水流其南郭仲產曰若萊於東俱有方城又楚狂接輿耕於城之南皆傍此長山方城而名者也又唐勒奏土論云楚世伯南土自越以至葉宏境萬里故號曰萬城楊用修以方城爲萬城伯晦引史記阻之以鄧林緣之以方城及服虔杜預之說以闕之

桓寬鹽鐵論云楚有汝淵滿堂之固

趙都邑

關塞附

趙城

史記趙之先造父封趙城通釋云在晉州趙城縣

耿

晉獻公賜趙夙耿通釋云河中府龍門縣東南索隱云
今河東皮氏耿鄉也

原

趙世家重耳爲晉文公趙衰爲原大夫居原任國政括
地志故原城在懷州濟原縣西北二里左傳云襄王以
原賜晉文公原不服文公伐原以示信原降以趙衰爲
大夫卽此也原本周畿內邑也索隱曰系本成季徙原
列國紀聞云襄子嘗居原

晉陽

趙世家趙襄子時知伯率韓魏攻趙趙襄子懼乃奔保晉陽列國紀聞云趙簡子居晉陽

中牟

趙獻侯治中牟索隱曰在河北非鄭之中牟地理志河南中牟縣趙獻侯自耿徙此

邯鄲

趙敬侯元年始都邯鄲蘇秦說趙肅侯曰山東之建國莫如趙強地方三千里西有常山南有河漳東有清河北有燕國宋白曰邯鄲本衛地後屬晉七國時爲趙郡趙敬侯自晉陽始都邯鄲地理志云自中牟徙此按史

記六國年表周安王之十六年趙敬侯之元年烈王之
二年趙成侯之元年成侯二十二年魏克邯鄲是年顯
王之十六年也二十四年魏歸邯鄲若敬侯已都邯鄲
魏克其國都而趙不亡何也至顯王三十二年公子范
襲邯鄲不勝而死是年肅侯之三年也意此時趙方都
邯鄲蓋肅侯徙都非敬侯也漢志云趙地昴畢之分野
趙分晉得趙國北有信都真定常山中山又得涿郡之
高陽鄭州鄉東有廣平鉅鹿清河河間又得渤海郡之
東平舒中邑文安東州成平章武河以北也南至浮水
繁陽內黃斥邱西有太原定襄雲中五原上黨上黨本
韓之別郡也遠韓近趙後卒降趙皆趙分也趙中山地

薄人眾猶有沙邱紂淫亂餘民丈夫相聚遊戲悲歌恍
慨起則椎剽掘塚作姦巧多弄物爲倡優女子彈絃跕
躑游媚富貴徧諸侯之後宮邯鄲北通燕涿南有鄭衛
漳河之間一都會也其土廣俗雜大率精急高氣勢輕
爲姦太原上黨又多晉公族子孫以詐力相傾矜夸功
名報仇過直嫁娶送死奢靡漢興號爲難治常擇嚴猛
之將或任殺伐爲威父兄被誅子弟怨憤至告訐刺史
二千石或報殺其親屬鍾代以北迫近匈奴民俗悍伎
好氣爲姦不事農桑自全晉時已患其剽悍而武靈王
又益厲之故冀州之部盜賊常爲宅州劇定襄雲中五
原本戎狄地頗有趙齊魏楚之徒其民鄙樸少禮文好

射獵鴈門亦同俗於天文別屬燕

信都

李公緒趙記云趙孝成王造檀臺之宮爲趙都朝諸侯
故曰信都亦見宮室攷又史記云客說張耳曰兩君羈
旅難以獨立立趙後扶以義可以就功乃求趙歇立爲
趙王居信都

扞關

以下附

蘇厲爲齊遺趙王書曰秦之上郡近扞關至於榆中千
五百里呂氏云扞者扞敵之扞非關名也趙之扞關陸
道之關也楚之扞關水道之關也

句注塞

句注塞者呂氏春秋九塞之一也匈奴傳趙襄子踰句注而破并代張儀說燕曰昔趙襄子欲并代與代王遇於句注之塞郡縣志晉咸寧二年句注碑曰蓋北方之險有盧龍飛狐句注爲之首天下之阻所以分別外內博物志云趙東臨九州西瞻恆嶽有沃瀑之流飛狐井陘之險至於潁陽涿鹿之野鹽鐵論云趙結飛狐句注以存荆代一統志云句注山在代州西二十五里一名西陘史記正義云夏屋與句注相接

鴈門塞

鴈門山在代州北三十五里志云以鴈出其門故名鴈門塞關因山以立凡山西之關四十有餘皆踞隘保固

而聳拔雄壯則鴈門爲最故趙李牧漢郅都備邊於此
匈奴不敢近塞固皆一時良將不可謂非地險也史記
李牧者趙之北邊良將也常居鴈門備匈奴以便宜置
吏市租皆輸入幕府爲士卒費日擊數牛饗士習騎射
謹烽火多用間諜厚遇戰士爲約曰匈奴卽入盜卽入
收保有敢捕虜者斬匈奴每入烽火警輒入收保不敢
戰如是數歲亦不亡失

高闕塞

杜氏通典趙武靈王築長城自代傍陰山下至高闕爲
塞水經注云長城之際連山刺天其山中斷兩岸雙闕
善能雲舉望若闕焉節狀表目故有高闕之名也自闕

北出荒中關口有城跨山結局謂之高關戍上古迄今常置重捍以防塞道

長城

括地志云趙武靈王長城在朔州善陽縣北今按史記趙肅侯七年築長城及武靈王北略中山之地至於房子遂之代北至無窮西至河登黃華之上召樓緩謀曰我先王因世之變以長南藩之地屬阻漳滏之險立長城是武靈王之前已有長城疑括地志脫一字當是武靈王修長城也圖書記云趙簡子築長城以備狄又在肅侯之前矣虞氏記云趙侯自五原河曲築長城東至陰山又於河西造大城一箱崩不就乃改卜陰山河曲

而禱焉晝見羣鶴游於雲中徘徊經日大光在其下乃
卽於其處築城今雲中城是也

魏都邑

關塞附

魏

史記晉獻公以魏封畢萬魏城在陝州芮城縣北五里
漢河北縣輿地廣記河中府永樂縣古魏國唐分芮城
置水經注永樂澗水北出於薄山南流逕河北縣故城
西故魏國也晉以封畢萬左思賦魏者畢昴之所應虞
夏之餘人先王之桑梓列聖之遺塵考之四隈則八埏
之中測之寒暑則霜露所鈞

霍

魏悼子徙居霍晉州霍邑縣索隱曰系本云武仲生莊子絳無悼子又系本居篇曰魏武子居魏悼子徙霍宋忠曰霍地名今河東絳縣也則是有悼子系本卿大夫代自脫耳

安邑

地理志河東安邑魏絳自魏徙此魏世家武侯二年城安邑秦紀昭王二十一年魏獻安邑國策云安邑者魏之柱國晉陽者趙之柱國也鄢郢者楚之柱國也郡縣志安邑故城在陝州夏縣東北十五里禹所都

柱國者都也

大梁

魏世家惠王三十一年秦用商君東地至河而齊趙數

破我安邑近秦於是徙治大梁水經注大梁城本春秋之陽武高陽鄉於戰國爲大梁周梁伯之居今開封府祥符縣也魏又有少梁史記韓魏戰於少梁注魏有大梁故此稱少梁耳蘇秦說魏襄王曰大王之地南有鴻溝陳汝南許鄆昆陽召陵武陽新都新鄴東有淮潁煮棗無胥西有長城之界北有河外卷衍酸棗地方千里地名雖小然而田舍廬廡之數曾無所芻牧人民之眾車馬之多日夜行不絕鞫鞫殷殷若有三軍之眾臣竊料大王之國不下楚說趙曰秦之攻韓魏也無有名山大川之限稍蠶食之傳國都而止張儀說魏王曰魏地四平諸侯四通輻湊無名山大川之限從鄭至梁二百

餘里車馳人走不待力而至梁南與楚境西與韓境北與趙境東與齊境卒戍四方守亭障者不下十萬梁之地勢固戰場也梁南與楚而不與齊則齊攻其東東與齊而不與趙則趙攻其北不合於韓則韓攻其西不親於楚楚攻其南此所謂四分五裂之道也博物志云魏前枕黃河背漳水瞻王屋望梁山有藍田之寶浮池之淵漢地理志云魏地菁觶參之分野也其界自高陵以東盡河東河內南有陳留及汝南之召陵瀍疆新汲西華長平潁川之舞陽鄆許鄆陵河南之開封中牟陽武酸棗卷皆魏分也河內本殷之舊都周既滅殷分其畿內爲三國詩風邶鄘衛國是也邶以封紂子武庚鄘管

叔尹之衛蔡叔尹之以監殷民謂之三監故書序曰武王崩三監畔周公誅之盡以其地封弟康叔號曰孟侯以夾輔周室遷邶鄘之民於雜邑故邶鄘衛三國之詩相與同風邶詩曰在浚之下鄘曰在浚之郊邶詩又曰亦流於淇河水洋洋鄘曰送我淇上在彼中河衛曰瞻彼淇澳河水洋洋故吳公子札聘魯觀周樂聞邶鄘衛之歌曰美哉淵乎吾聞康叔之德如是是其衛風乎至十六世懿公亡道爲狄所滅齊桓公帥諸侯伐狄而更封衛於河南漕楚邱是爲文公而河內殷墟更屬於晉康叔之風旣歇而紂之化猶存故俗剛強多豪傑侵奪薄恩禮好生分河東土地平易有鹽鐵之饒本唐堯所

居詩風唐魏之國也周武王子唐叔在母未生武王夢
帝謂己曰余名而子曰虞將與之唐屬之參及生名之
曰虞至成王滅唐而封叔虞唐有晉水及叔虞子變爲
晉侯云故參爲晉星其民有先王遺教君子深思小人
儉陋故唐詩蟋蟀山樞葛生之篇曰今我不樂日月其
邁宛其死矣他人是愉百歲之後歸於其居民皆思奢
儉之中念死生之慮吳札聞唐之歌曰思深哉其有陶
唐氏之遺民乎魏國亦姬姓也在晉之南河曲故其詩
曰彼汾一曲寘諸河之側自唐叔十六世至獻公滅魏
以封大夫畢萬滅耿以封大夫趙夙及大夫韓武子食
采於韓原晉於是始大至於文公伯諸侯尊周室始有

河內之士吳札聞魏之歌曰美哉颯颯乎以德輔此則明主也文公後十六世爲韓魏趙所滅三家皆自立爲諸侯是爲三晉趙與秦同祖韓魏皆姬姓也自畢萬後十世稱侯至孫稱王徙都大梁鮑氏謂他國有山川關塞唯梁無之皆以卒戍守按九域志卒戍四方守亭障者參列粟糧庾不下十萬宋都大梁太祖欲西邊洛陽據山河之固曰不出百年民力殫矣後山陳氏謂開封無山川之阻爲四戰之地故太祖以兵爲衛畿內常用十四萬人

長城附

戰國之世各有長城秦昭王築長城以備邊楚有長城

又有扞關以拒巴趙肅侯築長城以備邊齊宣王乘山嶺之上築長城東至海西至濟州以備楚燕築長城自造陽至襄平置上谷漁陽右北平遼東以拒敵魏之長城自惠王築也攷竹書紀年梁惠成王十二年龍賈帥師築長城於西邊魏世家惠王十九年築長城塞固陽城自鄭濱洛以北有上郡當是時秦數侵魏而西戎義渠稱王窺中國故築長城焉鹽鐵論曰魏濱洛築長城阻山帶河以保晉國

韓都邑

關塞附

韓原

韓世家韓之先與周同姓姓姬氏其後苗裔事晉得封

於韓原曰韓武子武子後三世爲韓厥從封姓爲韓氏
索隱曰按左傳云邗晉應韓武之穆則韓是武王之子
然詩稱韓侯出祖則是有韓而先滅今據此文云其後
裔事晉封於韓原曰韓武子則武子本是韓之後晉又
封之於韓原卽今之馮翊縣是也系本云韓萬生賕伯
賕伯生定伯簡簡生輿輿生獻子厥

州

宣子徙居州漢河內州縣括地志懷州武德縣本周司
寇蘇忿生之州邑也

平陽

貞子徙居平陽晉州臨汾縣世本云景子徙平陽

鄭

哀侯二年滅鄭因徙都鄭改號曰鄭蘇秦說韓王曰韓北有鞏洛成臯之固西有宜陽常阪之塞東有宛穰洧水南有陘山地方九百餘里國策頓子曰韓天下之咽喉魏天下之胸腹玉海云晉楚之霸也爭鄭秦之并六國也始於韓以虎牢成臯之險也秦拔成臯滎陽十九年而韓亡圖書編云河南豫州之地平夷洞達九有一轍八面受敵之場也而戰國之時韓魏以區區之陋邦北縈南齊環繞數千里界於楚秦齊趙四大國之間無再會不受敵而虎狼之秦搏噬尤亟其勢可謂危矣而終能雞唱荷戈月沈擊柝繼世相仍爲二百年之戰國

及與齊楚偕亡夫以二百年韓魏之君豈皆賢哉咸能
不失疆土則以生於憂患故耳漢地理志云韓地角亢
氐之分野也韓分晉得南陽郡及潁川之父城定陵襄
城潁陽潁陰長社陽翟郟東接汝南西接宏農得新安
宜陽皆韓分也及詩風陳鄭之國與韓同星分焉鄭國
卽今河南之新鄭本高辛氏火正祝融之墟也及成臯
滎陽潁川之崇高陽城皆鄭分也周宣王弟友爲周司
徒食采於宗周畿內是爲鄭鄭桓公問於史伯曰王室
多故何所可以逃死史伯曰四方之國非王母弟甥舅
則夷狄不可入也其濟洛河潁之間乎子男之國虢會
爲大恃勢與險密侈貪冒君若寄帑與賄周亂而敝必

將背君君以成周之眾奉辭伐罪亡不克矣公曰南方不可乎對曰夫楚重黎之後也黎爲高辛氏火正昭顯天地以生柔嘉之材姜嬴荆芊實與諸姬代相干也姜伯夷之後也嬴伯益之後也伯夷能禮於神以佐堯伯益能儀百物以佐舜其後皆不失祀而未有興者周衰將起不可偏也桓公從其言乃東寄帑與賄虢會受之後三年幽王敗桓公死其子武公與平王東遷卒定虢會之地右雒左洧食溱洧焉土陜而險山居谷汲男女亟聚會故其俗淫鄭詩曰出其東門有女如雲又曰溱與洧方渙渙兮士與女方秉蘭兮洵訏且樂惟士與女伊其將譖此其風也吳札聞鄭之歌曰美哉其細已甚

民弗堪也是其先亡乎自武公後二十三世爲韓所滅
韓自武子後七世稱侯六世稱王五世而爲秦所滅秦
旣滅韓徙天下不軌之民於南陽故其俗夸奢上氣力
好商賈漁獵藏匿難制御也宛西通武關東受江淮一
都會也自東井六度至亢六度謂之壽星之次鄭之分
野與韓同分

商阪 以下附西

蘇秦說韓宣惠王曰韓北有鞏洛成臯之固西有宜陽
商阪之塞六國表秦孝公十六年城商塞玉海云商阪
一作商塞卽商山也在商州商洛縣南一里亦曰楚山
武關在焉

成臯

北

困學紀聞云虎牢之險天下之樞也在號曰制在鄭曰
虎牢在韓曰成臯鹽鐵論云韓阻宜陽伊闕要成臯太
行

燕都邑

關塞附

薊

通釋周武王封召公於北燕都薊輿地廣記武王封帝
堯之後於薊又封召公於北燕其後燕國都薊詩補傳
曰薊後改爲燕猶唐之爲晉荆之爲楚或曰黃帝之後
封於薊者已絕成王更封召公奭於薊爲燕蘇秦說燕
文侯曰燕東有朝鮮遼東北有林胡樓煩西有雲中九

原南有滹沱易水博物志云燕卻背沙漠進臨易水西至君都東至於遼長蛇帶塞儉陸相乘也鹽鐵論云燕塞碣石絕邪谷繞援遼蘇代見燕王曰天下戰國七燕處弱焉獨戰則不能有所附則無不重南附楚楚重西附秦秦重中附韓魏韓魏重韓非子曰燕襄王以河爲境以薊爲國襲涿方城殘齊中山有燕者重無燕者輕

注方城涿之邑也

漢地理志云燕地尾箕分野也武王定殷封

召公於燕其後三十六世與六國俱稱王東有漁陽右北平遼西遼東西有上谷代郡鴈門南得涿郡之易容城范陽北新城固安涿縣良鄉新昌及渤海之安次皆燕分也樂浪元菟亦宜屬焉燕稱王十世秦欲滅六國

燕王太子丹遣勇士荆軻西刺秦王不成而誅秦遂舉
兵滅燕薊南通齊趙渤海之間一都會也初太子丹賓
養勇士不愛後宮美女民化以爲俗至今猶然賓客相
過以婦侍宿嫁娶之夕男女無別反以爲榮後稍頗止
然終未改其俗愚悍少慮輕薄無威亦有所長敢於急
人燕丹遺風也上谷至遼東地廣民希數被外患俗與
趙代相類有魚鹽棗栗之饒北鄰烏丸夫餘東賈真番
之利元菟樂浪武帝時置皆朝鮮濊貉句驪蠻夷殷道
漸衰箕子去之朝鮮教其民以禮義田蠶織作樂浪朝
鮮民犯禁八條相殺以當時償殺相傷以穀償相盜者
男沒入爲其家奴女子爲婢欲自贖者人五十萬雖免

爲民俗猶羞之嫁娶無所讎是以其民終不相盜無門戶之閉婦人貞信不淫辟其田民飲食以籩豆都邑頗放效吏及內郡賈人往往以杯器食郡初取吏於遼東吏見民無閉藏及賈人往者夜則爲盜俗稍益薄今於犯禁浸多至六十餘條可貴哉仁賢之化也然東夷天性柔順異於三方之外故孔子悼道不行設浮於海欲居九夷有以也夫樂浪海中有倭人分爲百餘國以歲時來獻見云自危四度至斗六度謂之析木之次燕之分也

遼東郡

以下附

匈奴傳燕置遼東郡以備邊通典云舜營州遼水之東

是也燕置遼東郡秦漢因之

遼西郡

通典云燕築遼西郡

上谷郡 漁陽郡 右北平郡

天下圖書記云燕築長城又置上谷漁陽右北平遼東以隔中外

朝鮮障

蘇秦曰燕東有朝鮮遼東按朝鮮傳王滿燕人自始燕時嘗略屬真番朝鮮爲置吏築障秦滅燕屬遼東外徼長城

匈奴傳燕築長城自造陽至襄平置上谷漁陽右北平

遼西遼東以別中外冠帶戰國七而三國邊於匈奴燕
與戎相接杜氏通典云北狄以畜牧爲業隨逐水草無
文書俗簡易以言語爲約束然各有分地射獵禽獸食
肉衣皮習於攻戰此天性也唐虞則山戎夏則獯鬻周
則獫狁懿王時德衰侵暴及造陽人被其苦至曾孫宣
王乃命將討伐至太原稱爲中興其後山戎越燕伐齊
後又伐燕齊桓公救燕敗走乃襄王之時戎狄至雒邑
東衛境侵盜尤甚晉文公乃興師攘卻居於西河圖洛
之間圖音號曰赤翟白翟而晉北有林胡樓煩之戎燕
北有東胡山戎各分散谿谷自爲君長往往而聚者百
有餘戎然不相統一自晉悼公納魏絳之謀和諸戎之

後而晉強至安王之時趙襄子踰句注而破之洎於戰
國趙武靈王築長城其後燕將秦開襲破東胡卻地千
餘里燕亦築長城以自固北邊備對云古來築長城以
扞北虜者四世燕趙秦隋也秦制多仍燕趙而隋氏不
盡因秦也

七國攷卷三

七國攷卷四

明烏程董說

秦宮室

西垂宮

秦文公元年居西垂宮見秦紀

封宮

一作平封宮

武公元年居平陽封宮正義曰封宮在岐州平陽城內也雍錄云平陽宮在華山下徐廣云一云居平封宮

大鄭宮

秦紀德公元年初居雍城大鄭宮括地志云岐州雍縣南七里故雍城秦德公大鄭宮城也

陽宮

秦別紀宣公享國十二年居陽宮

左宮

秦別紀夷公不享國死葬左宮

霸宮

三秦紀云霸城秦穆公築爲霸宮

高泉宮

陝西志高泉宮在扶風縣東美陽縣故城秦宣太后嘗居之

甘泉宮

史記齊人茅焦說秦王曰秦方以天下爲事而大王有

遷母太后之名恐諸侯聞之由此倍秦也秦王乃迎太后於雍而入咸陽復居甘泉宮按陝西有淳化有甘泉宮秦甘泉宮初其上也劉敞曰秦王政二年起甘泉宮應劭曰甘泉宮名在雲陽一名林光薛瓚史記註云甘泉山名林光秦離宮名

號宮

漢志號有號宮宣太后起雍錄云在岐州號縣

離宮

史記范雎見秦王於離宮應劭曰離本卦體名秦以名宮秦有封宮離宮王律曰離宮別宮也二說不知孰正

秦川宮

郡國志秦川宮者昔非子封秦於此築宮室

長安宮

郭氏元中記云秦文公造長安宮西面四百里南至終南山

芷陽宮

水經注襄王芷陽宮在塿上

械陽宮

秦昭王起械陽宮見鄭志雍錄云械陽宮在岐州扶風漢書文帝紀二年夏行幸雍械陽宮張晏曰秦昭王所作

黃陽宮

三輔黃圖黃陽宮秦文王所起在今鄂縣西南二十三里一統志云黃陽宮秦惠文王建漢時猶存宣帝嘗幸之應劭曰黃音倍

羽陽宮

陳倉有羽陽宮秦武王起見鄭志又歐陽公研譜云相州真古瓦朽腐不可用世俗尚其名爾今人乃以澄泥如古瓦狀埋土中久而研之然近有長安民獻秦武公羽陽宮瓦十餘枚若今人甬瓦然首有羽陽千歲萬歲字其瓦猶今舊瓦殊不朽腐研北雜志曰秦羽陽宮在鳳翔寶雞縣界歲久不知其處宋元祐六年正月直縣門之東百步居民權氏浚地得古筒瓦古鐻一尙完面

徑四寸四分瓦面隱起四字曰羽陽千歲篆字隨勢爲之不取方正始知卽羽陽舊址也

橐泉宮

皇覽云秦繆公冢在橐泉宮祈年觀下廟記云嘉泉宮秦孝公造祈年觀德公造漢書注作橐泉宮

興樂宮

三輔故事云咸陽宮在渭北興樂宮在渭南秦昭王通兩宮之間作渭橋長三百八十步

咸陽宮

刺客傳秦王朝服設九賓見燕使者咸陽宮劉向曰秦未兼天下卽厚斂起咸陽宮

華陽宮

秦史秦太子妃曰華陽夫人華陽秦太子宮名在陝西

西安府舊長安城內

太子卽秦孝文王柱也

六英宮

廣記云主父入秦直至昭王所居六英之宮而人不覺

高寢

秦別紀康公享國十二年居雍高寢共公享國五年居雍高寢景公享國四十年居雍高寢

大寢

秦別紀桓公享國二十七年居雍大寢

愛寢

秦別紀躁公享國十四年居愛寢

冀闕

史記孝公十二年作爲咸陽築冀闕徙都之劉伯莊云冀猶記事闕卽象魏也或曰人臣至此必思其所闕三輔黃圖云孝公改都咸陽築冀闕其曰闕必古象魏矣而何以標名爲冀也按史記孝公十一年衛鞅圍安邑降之十二年作冀闕冀者冀州也安邑卽冀州之邑也冀之爲州堯舜禹皆嘗都焉今孝公已得冀州而築冀闕其必放古闕存者而初立此名也

秦殿

荆軻傳秦法羣臣侍殿上者不得持尺寸之兵又燕丹

子曰荆軻至秦殿上展圖荆軻拔匕首擲秦王決耳入銅柱火出 余又按各國宮室魏有丹衣柱趙晉陽宮銅柱秦殿銅柱並見本國宮室攷楚有鐵柱見列異傳

章臺

蘇秦說楚威王曰今欲西面而事秦則諸侯莫不南面而朝於章臺之下矣又楚懷王入秦朝章臺如藩臣禮見楚世家

三休臺

李善文選注云戎王使由余聘秦秦穆公示以宮室引之登三休臺由余曰臣國土墍三尺茅茨不剪寡君猶謂作之者勞居之者淫此臺若鬼爲之則神勞矣使人

爲之則人亦勞矣

祀雞臺

一統志陝西鳳翔府寶雞縣東二十里有祀雞臺秦文公立寶雞祠築此臺祀之

白起臺

長平城在郡之南秦壘在城西二軍共食流水澗相去五里秦坑趙眾收頭顱築臺於壘中因山爲臺崔嵬桀起號曰白起臺見上黨記

會盟臺

一統志會盟臺在河南河南府澠池縣西城外秦昭王與趙惠王會盟於此臺

靈臺

列女傳秦獲晉君以歸穆姬聞之乃與太子罃公子宏與簡璧穆姬女也衰絰履薪以迎公懼乃舍諸靈臺左傳同杜預曰靈臺在京兆鄠縣周之故臺史記作舍之上舍

鳳臺

劉向列仙傳蕭史者善吹簫作鸞鳳之樂秦穆公有女字弄玉好之公遂以妻焉日教弄玉作鳳鳴後數年吹簫似鳳聲鳳凰來止其舍公爲作鳳臺一統志作鳳女臺

祈年觀

一作祈年宮

詳橐泉宮水經注曰雍縣中年井○水經注無此句當有誤秦惠公

之故居所謂祈年宮也孝公又謂之橐泉宮名雖兩出其實一宮也酈又按地理志知其地皆屬雍縣又引崔駰之言曰穆公冢在橐泉宮祈年觀下又從而辨正其失曰劉向固言穆公葬無邱壟處矣惠公孝公並是穆公繼世之子孫無由起宮於祖宗之墳陵也以是推之知二證之非實也按酈此言則是祈年宮橐泉宮皆在惠公雍都而亦不知何人所建獨漢書曰祈年宮惠公所起也三輔黃圖作蕝年宮且曰秦穆公所造廟記宮在城外而始皇本紀則曰在雍皆以世遠難究其的也

廣成舍

史記藺相如奉璧西如秦秦王舍相如廣成舍索隱廣

成舍之名

張儀樓

杜甫石犀行蜀人矜誇一千歲泛濫不及張儀樓成都
記云張儀樓在于城外高百尺蜀紀云張儀既築龜城
作樓高百尺定江山南北之勢

觀樓 射圃

華陽國志秦惠王二十七年張儀與張若城成都周迴
十二里高七丈郫城周迴七里高六丈臨邛城周迴六
里高五丈造作下倉上皆有屋而置觀樓射圃成都縣
本治赤里街若徙置少城內城營廣府舍置鹽鐵市官
并長丞修整里闔市張列肆與咸陽同制

具園

左傳云鄭之有原圃猶秦之有具園也

五苑

韓子秦大飢應侯請發五苑果棗以活民按史記孝文
王元年赦罪人修先王功臣褒厚親戚弛苑圃

上林

應劭曰嬴秦未并天下章臺上林皆在渭南上林秦苑
名也

獸園

三輔黃圖秦有獸園烈士傳云秦王召魏公子無忌不
行使朱亥奉璧一雙詣秦秦王怒使置亥於獸園中

永巷

史記范睢得見於離宮佯爲不知永巷而入其中正義曰永巷宮中獄也

田齊宮室

梧宮

劉向說苑楚使使聘於齊齊王饗之梧宮水經注齊王享楚使梧宮之側有臺層秀臺西有碑漢熹平間立今廢按山東通志梧臺在臨淄縣界卽梧宮也又齊地記云齊城有梧桐臺唐韓翃青州詩栢寢寒蕪變梧臺宿雨收

雪宮

山東志古蹟青州有雪宮在府城內城隍廟西有遺址存齊王見孟子於雪宮卽此郡縣志雪宮故址在臨淄縣東北六里余按晏子春秋齊侯見晏子於雪宮姜齊有雪宮也文選謝惠連云雪宮見於東國雪山峙於西域注雪宮在齊故云東國

百畝室

老子注解齊有百畝之室按呂氏春秋齊宣王爲大室蓋百畝堂上三百戶三年而未成羣臣莫敢諫老子注解蓋引此也

右室

史記騶忌子以鼓琴見王威王說而舍之右室應劭曰

古諸侯置左右室也

瑤臺

說苑齊威王遊於瑤臺許慎淮南注帝有桀紂爲璇室瑤臺者璇瑤石之如玉以飾室臺也

柏寢臺

杜氏通典青州千乘縣柏寢臺齊景公與晏子遊處至田氏王亦屢游樂焉庾亮啟云齊威王不登柏寢之臺故忠臣日親楚莊王戒強臺而弗登故驕樂日疎

瑯琊臺

戰國春秋威王起瑯琊之臺倚山背流其高九仞淮南子注齊宣王樂瑯琊之臺三月不返按山東志瑯琊臺

在瑯琊山

戲馬臺

呂觀孟子注引國策云齊宣王登戲馬之臺羣臣皆從
今本無按志戲馬臺在新城縣治東世傳齊桓公歇馬之
臺一云景公

祭臺

山東志祭臺在平陰縣西南相傳齊康公葬此後人築
祭臺祭之或曰田齊之王祭之也

漸臺

齊宣王漸臺五重黃金白玉琅玕籠疏翡翠珠璣幕絡
連飾見列女傳

九重臺

說苑齊王起九重之臺募國中有畫者賜之錢狂卒敬君居常飢寒妻端正敬君工畫貪賜畫臺去家日久思念其妻畫像向之嘻笑旁人瞻見之以白王王卽設酒與敬君相樂謂敬君曰國中獻女無好者以錢百萬易妻可乎不者殺汝敬君倉惶聽許 余又按姜齊諸臺名可攷者左傳齊晏子侍於遄臺又齊有檀臺亢倉子齊有清臺不詳世代又闕子曰景公登虎圈之臺又一統志桓公臺在樂安縣東齊桓公盟諸侯於此臺他如穆臺牛山臺戰臺封衛臺封禪臺夫人臺或以地或以事名號猶多不能具載又齊威王閉虞姬九重之臺

稷山館

史記齊宣王喜文學游說之士自如騶衍淳于髡接子環淵之徒七十六人皆賜列第爲上大夫不治而議論是以齊稷下學士復盛且數百千人齊地記曰齊城西門側系水左右有講室趾往往存焉虞喜曰齊有稷山立館其下以待游士名曰稷山館七略云齊田駢遊稷下好談論號天口言不可窮盡余按稷山館一名講堂郡國志云齊桓公宮城西門外有講堂齊宣王立此學也故稱爲稷下學卽稷山館也

明堂

齊宣王欲毀明堂見孟子按禮記明堂位云明堂明諸

侯之尊卑昔成王封周公於曲阜令魯世世祀周公以天子之禮樂故泰山下有明堂相傳爲周公朝諸侯之處蓋魯封內有泰山後嘗以爲齊所代

○此句有誤

故齊南

有泰山云

美唐

呂氏春秋齊人走莒燕人爭金於美唐注美唐齊藏金之處楚方府三錢府之類也篇海云廟中路謂之唐

鹿囿

李郊宮室賦齊則柏臺鹿囿按孟子曰臣聞郊關之內有囿方四十里殺其麋鹿者如殺人之罪所謂鹿囿也

章華東門 閭門 武鹿門

史記宣王三十六年蘇代自燕來入齊見於章華東門
括地志云齊城章華之東有闔門武鹿門也東門國策
作南門

杏唐之門

魯連子魯仲連見孟嘗君於杏唐之門一作杏堂之門
稷門

劉向別錄稷門齊城門也談說之士期會於稷門下故
曰稷下一統志稷山者山有后稷祠故名稷山余按虞
喜所謂稷山館者稷山下之館也劉向所謂稷門者稷
山下之門也或以稷門爲稷館誤矣

司馬門

列女傳鍾離春詣齊司馬門按賈誼書曰天子宮門曰司馬門司馬貞曰天子門有兵欄曰司馬門也

雍門

戰國策孫子謂田忌曰使輕車銳騎衝雍門注雍去聲齊西門也博物志韓娥東之齊過雍門鬻歌假宿而去餘響遶梁三日不絕

郎門

韓子齊中大夫有夷射者御飲於王醉而出倚於郎門楚宮室

細腰宮

四川志巫山治西北楚襄王所遊之地有古楚宮遺址

尙存所謂細腰宮也按楚靈王亦好小腰淮南子靈王好細腰而民有殺食自飢也徐陵玉臺新詠序楚王宮內無不推其細腰衛國家人俱言訝其纖手述異記云楚中有宮人草狀如金荳花色紅翠俗說楚靈王時宮人數千皆多愁曠有囚死於宮中者葬之後墓上悉生此花

假君宮

越絕書云春申君子假君宮前殿屋蓋地東西十七丈五尺南北十五丈七尺堂高四丈十霑高丈八尺殿屋蓋地東西十五丈南北十丈二尺七寸戶霑高丈二尺庫東鄉屋南北四十丈八尺上下戶各二南鄉屋東西

六十四丈四尺上戶四下戶三西鄉屋南北四十二丈九尺上戶三下戶二凡百四十九丈一尺檐高五丈二尺雷高二丈九尺周一里二百四十一步春申君所造

大宮

國策吳與楚戰於柏舉蒙穀奔入大宮負雞次之典

渚宮

左傳云楚子西縊而縣絕王使適至使爲商公沿漢沂江將入郢王在渚宮下見之杜預注小洲曰渚正義曰商在漢水北漢水東流而南入江子西既至商聞讒言不敢居商縣沿漢水順流而下至江乃泝流逆上渚宮當郢都之南故王在渚宮下見之也

章華臺

左傳楚子卽位爲章華之宮納亡人以實之杜預曰章華南近華容縣余按楚華容城內又有章華臺蓋宮以臺名也

蘭臺之宮

風賦楚襄王遊於蘭臺之宮楚世家楚有人謂頃襄王曰王請繳蘭臺飲馬西河蘭臺一名南臺時所謂楚臺者也湖廣志楚臺山在歸州城中舊存楚襄王建臺於此因名又杜詩註作雲臺之宮

壽宮

楚辭蹇將憺兮壽宮注壽宮楚供神之宮也漢武帝時

置壽宮神君

楚殿

平原君傳毛遂定從於楚殿上韓詩外傳楚成王讀於殿上又楚莊王賜其羣臣酒日暮酒酣左右皆醉殿上又樂人優孟入殿門大哭余按齊景公時有得罪者景公大怒縛置之殿下是春秋已有殿矣

太室

史記楚共王有寵子五人無適立乃望祭羣臣請神決之而陰與巴姬埋璧於太室之庭杜預曰太室楚廟也據劉向別錄云楚有太室王遊焉是楚別館

葉庭

國策秦興師求九鼎周君患之顏率曰大王勿憂臣請東借救於齊謂宣王曰秦欲九鼎不若歸之大國齊王大發師五萬人救周而秦兵罷齊將求九鼎周君又患之顏率至齊謂齊王曰大國何淦之從而致之齊齊王曰將寄徑於梁顏率曰不可夫梁之君臣欲得九鼎謀之暉臺之下沙海之上其日久矣鼎入梁必不出王曰寡人將寄徑於楚對曰不可楚之君臣欲得九鼎謀之葉庭之下其日久矣鼎入楚必不出

小曲臺

列女傳楚恭王在小曲之臺令尹侍焉

層臺

楚書右篇楚莊王築層臺延石千里延壤百里國人勞苦罷敝士有反三月之糧者說苑云莊王築層臺大臣諫者七十二人皆死矣有諸御已者入諫莊王遂毀層臺而罷民楚人歌之曰薪乎萊乎無諸御已訖無子乎萊乎薪乎無諸御已訖無人乎按晉靈公嘗造九層臺

雲夢臺

高唐賦序遊於雲夢之臺通鑑注祝穆云據左傳邲夫入弃子文於夢中言夢而不言雲楚子避吳入於雲中言雲而不言夢則知雲夢二澤也漢陽志雲在江之北夢在江之南子產相楚楚子享之賦吉日王以田江南之夢蓋楚之雲夢跨江南江北故有南夢有北夢

陽雲臺

古文苑襄王與唐勒景差宋玉遊於陽雲之臺玉作大言賦文選作雲陽時所謂陽臺者

豫章臺

水經注江水又東得豫章口夏水所通也西北有豫章岡蓋因岡而得名矣或言因楚王豫章臺名

匏居臺

楚語伍舉曰先君莊王爲匏居之臺高不過望國氛大不過容晏豆木不妨守備用不煩官府或作抱居之臺
放鷹臺

一統志放鷹臺在湖廣安陸州州城東南五十里藪澤

間四望空闊極目千里而臺居其中昔楚王遊獵放鷹
於此又襄陽耆舊記云楚王好遊獵之事揚鑣馳逐乎
華容之下射鴻乎夏水之濱按荆門州北亦有放鷹臺
志云楚昭王放鷹之所

附社臺

湖廣志楚昭王遊獵與越姬同乘馳逐登附社之臺望
雲夢之圃顧謂姬曰樂乎對曰樂則樂矣不可久也亦
見列女傳

春申臺

一統志春申臺在壽州城內東北隅楚春申黃歇所築
遺址尙存

鈞臺

一統志鈞臺在江陵縣西南龍陂北相傳楚莊王垂鈞臺也

乾谿臺

新語楚靈王作乾谿之臺五百仞之高欲登浮雲窺天文薛綜注張衡東京賦引左氏傳迺云楚子成章華之臺於乾谿誤說也左傳實無此文章華與乾谿元非一處

中天臺

賈誼新書楚王作中天之臺三沐而後至其上按魏襄王亦作中天臺詳魏宮又文選注云周穆王築臺號曰

中天之臺中天言高及天半也

章華臺

楚靈王築一
名三休臺

左傳楚子成章華臺願與諸侯落之史記靈王七年就章華臺注宮室始成祭之爲落臺今華容城內湖廣志云華容城在監利縣又云章華臺一名三休臺按賈子新書翟王使使之楚楚王誇之饗於章華之臺三休乃至臺名三休疑取諸此國語云昔楚靈王不君其臣箴諫不入乃築臺於章華之上造爲石郭陂漢以象帝舜

章華臺

楚靈
王築

一統志楚章華臺在荊州府境有二臺一在府城外沙市一在監利縣東北皆傳以爲楚靈王所築其在監利

者又名三休臺唐胡曾詩茫茫衰草沒章華因笑靈王
昔好奢臺土未乾簫管絕可憐身入野人家

章華臺

楚襄王築

河南志河南開封府商水縣西北三里有章華臺初楚
靈王築章華臺於華容城內襄王爲秦將白起所迫北
保於陳更築此臺

五仞臺

說苑楚莊王與晉戰勝之懼諸侯之畏已也乃築爲五
仞之臺臺成而觴諸侯諸侯請約莊王曰吾薄德之人
也諸侯請爲觴乃仰而曰將將之臺窅窅其謀我言而
不當諸侯伐之於是遠者來朝近者入賓

九重臺

韓詩外傳齊景公使人於楚楚王與之上九重之臺

強臺

淮南子令尹子佩請飲莊王莊王許諾子佩疏揖北面立於殿下曰昔者君王許之今不果往意者臣有罪乎莊王曰吾聞子具於強臺強臺者南望料山以臨彷徨左江而右淮其樂忘死若吾薄德之人不可以當此樂也恐留而不能反國策云楚王盟強臺而弗登曰後世必有以高臺陂池亡其國者

荆臺

邊讓賦云靈王游雲夢之中息於荆臺之上家語云楚

王將遊荆臺司馬子期諫一統志荆臺在監利縣西三十里士洲之南

五樂臺

一統志湖廣河陽府有五樂臺在占州城東北相傳楚王出獵之所孟子注箋云楚康王作樂臺

京臺

文選注楚王登京臺南望獵山左江右湖其樂忘死

漸臺

列女傳貞姜者楚昭王夫人也王出遊留夫人漸臺之上王聞江水大至使使者迎夫人忘持其符使者請夫人夫人不去於是使者取符則江水大至臺崩夫人流

而死蔡邕琴操有漸水之臺疑卽此

朝雲館

襄陽耆舊傳楚襄王遊雲夢望朝雲之館

高唐館

傅武仲舞賦楚襄王旣遊雲夢使宋玉賦高唐之事李善注雲夢藪在南郡華容縣高唐楚觀名宋玉高唐賦序曰楚襄王與宋玉遊於雲夢之臺望高唐之觀漫叟詩話曰濠州西有高唐館俗以爲楚之高唐也宋閻欽愛詩借問襄王安在哉山川此地勝陽臺蓋言其非爾

高府

史記白公勝劫惠王置之高府杜預曰楚別府也

方府

莊辛說楚襄王方府之金方府藏金之府也

平府

呂氏春秋荆王發平府而視故記章句云平府藏書之室

三錢府

史記楚王使使封三錢之府

東面壇 西面壇

新序秦欲伐楚使者往觀楚王之寶器楚王聞之召昭奚恤問焉恤曰此觀吾國之得失而圖之寶器重於賢臣夫珠玉玩好之物非國之重寶也遂使恤發精兵三

百人陳於西門之內爲東面之壇一爲西面之壇一秦使者至曰貴客也請就上位

楚王池

楚王池在巫山縣治東北其水甘美相傳楚襄王曾於池上納涼見志

洗馬池

一統志洗馬池在湖廣荊州歸州得勝門外一里楚襄王時洗馬之所

永巷

列女傳吳勝楚入至郢昭王亡吳王闔閭盡妻其後宮次至伯嬴持刀曰近妾而死何樂之有如先殺妾又何

益於君王王慚遂退舍伯嬴與其保阿閉永巷之門皆不釋兵三旬秦救至昭王乃復矣

龍門

楚辭望龍門而不見

蛇門

吳地記蛇門南面有陸無水春申君造以禦越軍在已地以屬蛇因號蛇門

茅門

詳見刑法攷一作第門

棘門

李園殺春申於棘門見史記

楚門

越絕書楚門春申君所造楚人從之故爲楚門

脩門

宋玉招魂魂兮歸來入脩門些王逸注脩門郢城門也

趙宮室

信宮

武靈王十九年春正月大朝信宮見趙世家

晉陽宮

國策張孟談曰臣聞董子之治晉陽也公宮之垣皆以荻蒿苫楚廡之其高至丈餘君可發而爲矢於是發而試之其堅則箇鏑之勁不能過也君曰矢足矣吾銅少

若何張孟談曰臣聞董子之治晉陽也公宮之室皆以
鍊銅爲柱質請發而用之則有餘銅矣及三國之兵乘
晉陽城三月不能拔呂覽章句云晉陽之宮銅柱礎天
下之雄宮也又云董治晉陽築兵宮而人不見緝矢垣
而鄰國不備古以銅爲兵春秋戰國皆然郡國志云太
原府城中又有三城其一曰大明城卽古晉陽城也董
安于所築晉陽故宮一名大明宮在州城內

避暑宮

一統志趙王臺在山西遼州府和順縣西二里狀如伏
虎人相傳爲趙襄子避暑宮

東宮

武靈王二十七年五月戊申大朝於東宮傳國立王子何以爲王見史記

沙邱宮

史記主父飢死沙丘宮正義曰在邢州平鄉縣東北二十里

壇臺之宮

李公緒趙記曰趙孝成王造壇臺之宮爲趙都朝諸侯故曰信都

邯鄲宮

述異記曰邯鄲有故邯鄲宮基址存焉中有趙王果園梅李至冬而花春得食

叢臺

郡國志趙有叢臺有洪波臺劉劭趙都賦結雲閣於南
宇立叢臺於少陽唐開元十七年嚴浚作叢臺賦張衡
東京賦云周姬之末不能厥政政用多僻始於宮鄰卒
於金虎嬴氏搏翼擇肉西邑是時也七雄並爭競相高
以奢麗楚築章華於前趙建叢臺於後太平御覽云趙
武靈王建叢臺於邯鄲漢書高后紀趙王宮叢臺災師
古曰運聚非一故名叢臺蓋本六國時趙王故臺也在
邯鄲城中

洪波臺

見郡國志又韓詩外傳曰趙簡子有臣曰周舍吏於門

下抱筆執牘從之書過簡子與之居無幾死後與諸大夫飲於洪波之臺酒酣泣曰千羊之皮不如一狐之腋眾人之唯唯不如周舍之諤諤今舍死吾亡無日矣

鑿臺

一統志山西太原府有鑿臺在榆次縣南史記云智伯信韓魏從而伐趙攻晉陽韓魏殺之於鑿臺之下卽此後爲洞渦水所沒

檀臺

趙成侯時魏獻榮椽因以爲檀臺見趙世家水經注作檀臺

野望臺

述異記恆州野望臺趙武靈王以登高亦曰寒臺

野臺

史記武靈王十七年王出九門爲野臺以望齊中山之境徐廣曰一作望臺按括地志野臺一名義臺在定州樂縣西南六十三里

清臺

韓詩外傳趙簡子太子名伯魯小子名毋恤簡子自爲二書牘親自表之書曰節用聰聽敬賢勿慢使能勿賤與二子使誦之居三年簡子坐清臺之上問二書所在伯魯忘其表令誦不能得毋恤出其書於袖令誦習焉乃黜伯魯而立毋恤清臺一作青臺

東廟

淮南子潛王專用淖齒而死於東廟

邯鄲廡

趙世家趙孝成王十二年邯鄲廡燒徐廣曰庫廡之名音膾索隱曰廡積芻藁之處

鹿苑

一統志鹿苑在山西遼州和順縣西二里相傳爲趙襄子養鹿苑

趙圃

脩墨錄昔戰國趙王作游圃多植松柏名曰趙圃又韓子云趙王遊於圃中左右以兔與虎而輟觀之盼然環

其眼

司馬門

國策武安君北面再拜賜死縮劍將自誅乃曰人臣不得自殺宮中過司馬門趨甚疾出諺門也右舉劍將自誅臂短不能及銜劍徵之於柱以自刺

諺門

詳司馬門

廣門

燭過典廣門之左詳見趙職官

鹿門

史記趙肅侯十六年肅侯遊大陵出於鹿門

無窮之門

國策武靈王曰昔者先君襄王與代交地城境封之名曰無窮之門所以詔後而期遠也

遺遺之門

國策武靈王率騎北行出於遺遺之門

魏宮室

丹宮

沈休文史記注梁襄王之丹宮趙成侯之檀臺麗華冠於一時余按國策魏惠王廣公宮制丹衣柱疑丹宮之名從此起也然國策乃惠王沈休文作襄王或別丹宮爾

范臺

國策梁王觴諸侯於范臺酒酣請魯君舉觴魯君興避席擇言曰主君之尊儀狄之酒也主君之味易牙之調也左白台而右閭須南威之美也前夾林而後蘭臺強臺之樂也有一於此足以亡國梁王稱善余按白台閭須魏之美女夾林蘭臺魏之宮苑也故曰南威之美強臺之樂蓋云魏之美女可比南威魏之宮苑可比強臺文章虛實一讀可辨舊注以白台等皆作影語謬甚矣

蘭臺

詳范臺

文臺

無忌上魏王書邊城盡拔文臺墮垂都焚索隱曰文臺臺名列士傳曰隱陵君施酒文臺

京臺

楚策更羸與魏王處於京臺之下仰見飛鳥

暉臺

國策顏率曰梁之君臣欲得九鼎謀之暉臺之下沙海之上其日久矣注臺名曰暉

靈臺

河南志靈臺在府城南二十里戰國魏侯罃所築俗名梁惠王臺洪範五行傳曰天子曰靈臺諸侯曰時臺春秋緯曰天子靈臺諸侯觀臺禮含文嘉曰天子靈臺以

攷觀天人之際法陰陽之會也

中天臺

新序魏襄王將欲爲中天臺許綰負插而入曰聞大王將爲中天之臺願加一力臣聞天與地相去萬九千里其趾當方一萬里○按此文有脫誤新序云臣聞天與地相去萬五千里今王因而半之當起七千五百里之臺高既如是其趾須方八千里然罷築者

文侯臺

魏臺在魏縣界相傳魏文侯築故謂之文侯臺也見志拜郊臺

一統志直隸大名府南大門外有高臺相傳魏惠王拜

郊臺今稱村曰臺頭堡

武侯臺

武侯臺在今直隸大名府南一十里舊有壇曰武侯壇相傳謂魏武侯壇也見府志

正殿

說苑魏文侯御廩災文侯素服避正殿

夾林

詳范臺

梁囿

國策魏有梁囿温囿又信陵君書五入囿中索隱曰囿卽圃田鄭藪屬魏

温圃

詳梁圃

逢忌藪

薛瓚漢注引汲郡古文云梁惠王發逢忌之藪以賜民
今浚儀有逢陂忌 是也又見魏食貨攷

青沼

世說葆真池卽梁惠王故沼桓譚云魏王爲青沼按孟
子見梁惠王王立于沼上疑此沼也

麗譙

莊子徐無鬼見魏武侯曰無盛鶴列於麗譙之間注鶴
列陳兵也麗譙高樓也亦作麗譙謂華麗而譙嶢戰樓

名也按周禮司市思次鄭司農云次市中候樓也周亦有候樓陸機洛陽記曰洛陽城周公所制城上百步有一樓櫓外有溝渠又黃帝有五城十二樓見漢郊祀志范蠡爲勾踐作飛翼樓以象天門見吳越春秋

郎門

國策梧下先生見魏王曰願王專事秦無有他計魏王曰諾客趨出至於郎門而反注郎門者按韓非子使郎中開道於郎門之內也

夷門

史記魏有隱士曰侯嬴年七十家貧爲大梁夷門監者太史公曰吾過大梁之墟求問其所謂夷門夷門者城

之東門也

韓宮室

鴻臺宮

張儀說韓王曰秦下甲據宜陽斷韓之上地東取成臯
滎陽則鴻臺之宮桑林之苑非王之有也注韓之宮室
其地未詳

望氣臺

韓王望氣臺見玉海

聽訟觀臺

孫子荆過臺賦敘曰酸棗寺門外夾道左右有兩故臺
訪之故老云韓王聽訟觀臺高一十五仞樓雖泯滅然

廣基似於山嶽召公大賢猶舍甘棠區區小國而臺觀
隆崇驕盈於世以鑿來今故作賦曰望韓王之故臺尋
往代之所營雙闕碍以峻峙貫雲氣而上征歷千載而
特立顯妙觀乎太清薄邯鄲之叢臺陋楚國之章華邈
宕巽以亢極豈岑樓之能加至乃宮觀宏敞增臺隱天
伐文梓於萬仞發玉石於三泉優倡角烏烏之聲蛾眉
戲白雪之舞紛淫衍以低仰翳修袖而容與

桑林苑

詳鴻臺宮

高門

韓世家韓昭侯二十五年旱作高門屈宜曰曰昭侯不

出此門何也不時吾所謂時者非時日也人固有利不利時詔侯嘗利矣不作高門往年秦拔宜陽今年旱昭侯不以此時卹民之急而顧益奢此時絀舉羸二十六年高門成昭侯卒果不出此門劉向別錄云韓宮室之美有桑林高門金玉布列五色錯舉

燕宮室

碣石宮

史記騶衍如燕昭王築碣石宮身親往師之正義云碣石宮在幽州薊縣西三十里寧臺之東

甘棠宮

昔召公巡行鄉邑有棠樹決獄政事其下召公立卒而

民人思召公之政懷棠樹不敢伐作甘棠之詩後昭王
慕召公之政起甘棠宮祠召公焉見詩緯注

元英宮

樂毅報燕王書大呂陳於元英索隱曰大呂齊鐘名元
英燕宮殿名也

洞宮

仙傳燕昭王得洞光之珠以飾宮故曰洞宮劉滄有宿
洞宮詩沐髮清齊宿洞宮又唐人稱道院曰洞宮

明光宮

十二國續史燕惠王起明光宮金緯玉經白刃爲表周
宮爲衣迷不知其所從入

東宮

燕丹子燕太子丹自喜得荆軻永無秦憂日與軻遊東宮臨池而觀拾瓦投黿太子令人捧槃金丸進之按左傳注云太子不敢居上位故常居東宮

正寢

拾遺記云燕昭王居正寢召其臣甘需曰寡人志於仙道欲學長生久視之道可得遂乎

磨室

史記樂毅書故鼎反乎磨室索隱曰燕鼎前輸於齊今反入於磨室宮名徐廣曰磨厯也國策新序作厯室

祇明室

靈氣寶符云燕昭王坐祇明之室升於泉昭之館此館常有白鳳白鸞遠集其間

展臺

一統志臺在涿州西南舊傳燕昭王嘗展禮於此作展臺

寧臺

樂毅報燕王書齊器設於寧臺注寧臺燕之臺也

靈臺

口志燕昭王起靈臺窮極珍巧子時起工午畢謂之子午臺

黃金臺

上谷郡圖經黃金臺易水東南十八里昭王置千金於臺上以延天下之士述異記云黃金臺或呼爲賢士臺亦謂之招賢臺圖書編又稱金臺

小金臺

一統志黃金臺在順天府東南一十六里又一臺曰小金臺在府東南一十五里燕中雜記云小金臺昭王養學者之處也

金臺

晉書曰段匹磾討石勒進屯故安縣故燕太子丹金臺據此燕丹又有金臺也

仙臺

水經注燕王仙臺東有三峰甚爲崇峻騰冠眾峰高霞翼嶺岫壑冲深含煙罩霧耆舊言燕昭王求仙處按史記云齊威宣燕昭使人入海求蓬萊方丈瀛洲此三神山者其傳在渤海中去人不遠息且至則船風引而去蓋嘗有至者諸仙人及不死之藥皆在焉燕昭王蓋迷於仙者也

崇霞臺

拾遺記昭王登崇霞之臺

握日臺

亦見拾遺記

釣臺

水經注固安縣金臺陂西北有釣臺高十丈陂北十餘步有金臺有小金臺臺北有蘭馬臺並悉高數丈秀峙相對翼臺左右水徑流通長廡廣宇周旋被浦棟堵咸淪柱礎尙存耆舊咸言昭王禮賓廣延方士至如郭隗樂毅之徒鄒衍劇辛之儔自遠而至者多矣不欲令諸侯之客伺隙燕邦故脩建下都館之南垂燕昭創之於前子丹踵之於後

蘭馬臺

詳釣臺

禪臺

薛氏孟子章句曰燕噲築禪臺讓於子之後昭王復登

禪臺讓於樂毅毅以死自誓不敢受禪臺一名堯舜臺

逃齊臺

燕有逃齊臺在小金臺東北十六里相傳爲子之之亂齊伐燕羣臣登臺避兵後名臺曰逃齊臺見史記舊注余按帝王世紀云周赧王雖居天子之位爲諸侯所侵逼與家人無異貫於民無以歸之乃上臺以避之故周人因名臺曰逃債周之逃債燕之逃齊可云二逃雙妙

五花臺

一統志五花臺在易州治相傳周武王築爲日者占候之所曰候臺至戰國燕昭王建五樓其上嘗遊樂其間更名五花臺

三臺

三臺城在容城縣見志城家記云燕魏分易水爲界築三臺登降以耀武卽此

陽華臺

燕丹子云荆軻之燕太子爲置酒陽華之臺一作章華之臺

通雲臺

拾遺記昭王坐通雲之臺亦曰通霞臺山西有昭石去石十里視人物之影如鏡焉碎石片片皆能照人而質方一丈則重一兩昭春此石爲泥泥通霞之臺

泉昭館

詳祗明室

華陽館

史記索隱燕太子丹與樊將軍置酒華陽之館出美人奇馬一作華陽臺疑卽陽華臺也史無明文姑並存之又按水經注易水二館之城澗曲泉清山高林茂風煙披薄觸目怡情方外之士尙憑依舊居取暢林木二館謂樊於期荆軻之館也又云易水東歷燕之長城又東逕漸離城南蓋太子丹館高漸離處也

七國攷卷四

七國攷卷五

明烏程董說

楚國名

楚荆

呂覽荆平王得如黃之狗菌落之燬以畋於雲夢檀弓
襄公朝於荆國策有獻不死之藥於荆王者又荆宣王
問羣臣曰吾聞北方之畏昭奚恤也越絕書荆平王傳
韓非子齊荆攻魏魏王遣荆王美人亢倉子荆君熊圉
問水旱理亂韓詩外傳越王勾踐使廉稽獻民於荆王
尸子云荆者非無東西也而謂之南其南者多也說苑
吳王欲伐荆又魯襄公朝荆新序田贊衣儒衣而見荆

王通釋云荆自文王始見於春秋僖元年始稱楚莊十年荆敗蔡師於莘公羊曰荆者州名州不若國貶之若荆州之夷然也穀梁曰荆楚也何以謂之荆狄之也聖人立必後至天子弱必先叛左氏無此杜元凱曰荆楚本號也按詩云戎狄是膺荆舒是懲則荆爲楚之本號亦明矣

郢

桓子新論郢王好細腰而宮人餓屈原哀郢曰顧龍門而不見孰兩東門之可蕪史記齊湣王謂其相曰不若留太子以求楚之淮北相曰不可郢中立王是吾抱空質而行不義於天下也尸子郢王問於羣臣曰吾國治

乎按此楚荆郢並稱

趙國名

趙 邯鄲

竹書紀年周顯王十三年邯鄲成侯會燕成侯於安邑

十四年邯鄲伐衛十六年邯鄲之師敗我於桂陵

我言衛也

三十三年鄭威侯與邯鄲圍襄陵二十七年十月邯鄲

伐我北鄙隱王

卽赧王

十三年邯鄲命吏大夫奴遷於九

原將軍大夫適子代史皆貂服桓子新論云邯鄲立王

是抱空質也戰國春秋云邯鄲王有吞天下之心皆指

趙也

晉

韓魏趙號三晉詳見魏國名攷

魏國名

魏 梁

魏惠王徙治大梁國號曰梁按魏世家惠王三十一年秦用商君東地至河而齊趙數破我安邑近秦於是徙大梁竹書紀年梁惠成王九年四月甲寅徙邦於大梁與史記不合今按孟軻至梁在惠王三十五年從史記徙梁已四年從紀年徙梁已二十六年故其書曰梁惠梁襄不曰魏惠魏襄也又按魏世家惠王已後或稱魏如如耳見魏王張儀魏章皆歸於魏魏相田需死蘇秦謂魏王秦昭王謂左右今韓魏與始孰疆魏人有唐雎

謂魏王秦昭王遽爲發兵救魏趙使人與魏王無忌謂
魏王魏太子增質於秦皆稱魏也或稱梁如鄒衍淳于
髡孟軻皆至梁楚相昭魚謂蘇代君其爲梁王代請說
臣遂北見梁王韓亡秦有鄭地與大梁鄰皆稱梁也

晉

趙岐孟子注韓魏趙本晉六卿當此時號三晉故梁惠
王曰晉國天下莫強焉

韓國名

韓 鄭

戰國策襄王時周最使鄭立韓擾而廢公叔周最患之
曰公叔之與周君交也今我使鄭立韓擾而廢公叔語

曰怒於室者色於市今公叔怨齊無柰何也必絕周君而深怨我矣史舍曰公行矣請令公叔必重公周最行至鄭注云鄭韓也又釐王時或謂鄭王曰昭釐侯一世之明君也注云鄭王韓王也按竹書紀年周安王二十一年魏武侯六年韓滅鄭哀侯入於鄭烈王二年晉桓公邑哀侯於鄭曰韓山堅賊其君哀侯曰韓其侯趙成侯遷晉桓公於屯留是猶稱韓不稱鄭也顯王元年鄭城邢丘自是已後變韓爲鄭三年曰公子景賈帥師伐鄭七年曰王會鄭釐侯於巫沙九年曰秦師伐鄭次於懷十年曰鄭取屯留尙子十一年曰鄭釐侯使許息來致地平邱戶牖首垣諸邑及鄭馳地我取枳道與鄭鹿

王及鄭釐侯盟於巫沙以釋它陽之圍歸釐於鄭十二年曰鄭釐侯來朝十四年曰秦公孫壯伐鄭十五年曰東周與鄭高都十六年曰王以韓師二十四年曰魏敗韓馬陵二十六年曰穰疵帥師及鄭孔夜戰於梁赫鄭師敗逋三十一年曰秦蘇胡伐鄭三十三年曰鄭威侯與邯鄲圍襄陵三十八年曰王會鄭威侯於巫沙愼靚王六年曰鄭侯使韓辰歸晉陽及向隱王元年曰鄭宣王來朝梁七年曰翟章救鄭數十年間稱韓者二稱鄭者十四矣

晉

詳見魏國名攷

七國攷卷五